


Segun Papito Rafael

E aña aki si Aruba lo bay cu e titulo



Riba e potret aki por mira na momento cu e all-star band ta entrenando.

ORANJESTAD (AAN): E ABC Festival mester a tuma lugar na Bonaire e aña aki, pero e isla no por a tume. Aña pasa esaki tabata na Curaçao, y e ultimo aki a kere cu nan por bolbe tume e aña aki. Como cu Curaçao no por tume pa dos aña sigui, Aruba a bin na remarca pa haci esaki. Mirando e hecho cu nan a haci hopi propaganda cu ABC lo ta na Curaçao di antemano caba, nan no por a hala atras y bisa pueblo Curasoleño cu nan no por sigui cu e Festival. Anto e ora nan a dicidi cu nan lo organiza un "ABC Show", y den e caso aki nan a invita e ganador di tumba cu un banda reforza, mescos ta e caso cu ganador di tumba di Bonaire. Como cu na Aruba ainda no a saca ganador, a dicidi di busca Papito y su Doble Sabor, comoquiera nan ta e banda di mas grandi di Aruba.

Papito a bay cu intencion di acompaña cinco cantante, pero como cu e final di Tumba Contest mes na Aruba tabata e dlanan ey, Papito a bay cu solamente Claudius. Nan a duna un show tremendo na Curaçao, unda cada isla a bini cu nan presentacion unico. E banda di Papito a toca e Roadmarch di aña pasa, algun tumba, y a termina cu "Manolo" cu a pone tur hende bira loco. Claudius Philips tambe a haci furor na Curaçao. Tabata tin presentacion di Doble R, ERA, Explosivos, y Turbo a compaña e Reina di Tumba.

Den un entrevista cu DIARIO, Papito a declara cu e ta kere cu Aruba por haci algo basta bon contra Curaçao y Bonaire awenochi, y ta kere cu e biaha aki si Aruba ta bay cu e titulo. E ta muestra cu e tumba di Robert Jeandor tin mas swing cu esun di Elia Isenia di Curaçao. "Si nos toke debidamente, mi ta kere cu e tin chance," el a declara.